

萃升書院講義

丁傳用事按語

按哀帝時外戚丁傳用事。實較成帝時王氏遠遜。後漢崔駰以書戒竇憲曰。漢興以後。迄于哀平。外家二十。保族全身。四人而已。通鑑注。外家二十者。呂氏。張氏。薄氏。竇氏。王氏。陳氏。衛氏。李氏。上官氏。史氏。許氏。霍氏。卬成王氏。元后王氏。趙氏。傅氏。丁氏。馮氏。衛氏也。惟文帝薄太后。竇后。景帝王后。卬成王后。四人。保族全家。武帝夫人李氏。雖追配武帝。昌邑王未幾而廢。非外家。當以史皇孫王夫人。足二十之數。按前漢外戚。綿侯封者。亦頗有人。霍氏未免言之太過。茲錄外戚列侯。見恩澤侯表者。如下。（呂氏已見不錄。）軹侯薄昭。高祖七年爲郎。從軍。十七年以中大夫迎帝於代。以車騎將軍迎皇太后侯。萬戶。元年正月乙巳封。十年。坐殺使者自殺。帝臨爲置後。十一年。易侯戎奴。嗣三十年薨。建元二年。侯梁嗣。章武景侯竇廣國。以皇太后弟侯。萬一千戶。孝文後七年六月乙卯封。七年薨。孝景七年。共侯定嗣。十八年薨。元光三年。侯常生嗣。十年。元狩元年。坐謀殺人未殺免。南皮侯。

竇彭祖以皇太后兄子侯。六月乙卯封二十一年薨。建元六年夷侯良嗣五年薨。元光五年侯桑林嗣十八年。元鼎五年坐酎金免。蓋靖侯王信以皇后兄侯。中五年五月甲戌封二十五年薨。元光三年頃侯充嗣。侯受嗣。元鼎五年坐酎金免。武安侯田蚡以皇太后同母弟侯。孝景後三年三月封。十年薨。元光四年侯恬嗣五年。元朔三年坐衣襜褕入宮不敬免。周陽懿侯田勝以皇太后同母弟侯。三月封。十二年薨。元光六年侯祖嗣。八年元狩三年坐當歸軹侯宅不免。長平烈侯衛青以將軍擊匈奴取朔方侯。後破右賢王益封。又封三子。皇后弟。元朔二年二月丙辰封二十三年薨。宜春侯伉五年四月丁未以青功封。元鼎元年坐攝制不害免。太初元年嗣。五年闌入宮完爲城旦。陰安侯不疑。四月丁未以青功封十二年。元鼎五年坐酎金免。發干侯登。四月丁未以青功封。坐酎金免。冠軍景桓侯霍去病以校尉擊匈奴侯。後以將軍破祁連迎昆邪王益封。皇后姊子。六年四月壬申封。七年薨。元鼎元年哀侯嬪嗣。七年薨。亡後。樂平侯山地節二年四月癸巳以從

祖祖父大將軍光功封三千戶。四年坐謀反誅。冠陽侯雲山弟。三年四月戊申。以大將軍光功封千八百戶。四年坐謀反誅。博陸宣成侯霍光。以奉車都尉捕反者莽何羅侯。二千三百五十戶。後以大將軍益封萬七千二百戶。始元二年正月壬寅封。十七年薨。地節二年四月癸卯侯禹嗣。四年謀反。要斬。元始二年四月乙酉。侯陽以光從父昆弟之曾孫龍勒士伍紹封三千戶。王莽篡位絕。安陽侯上官桀以騎都尉捕反者莽何羅侯。二千三百戶。女孫爲皇后。正月壬寅封五年。元鳳元年反誅。桑樂侯安。始元五年六月辛丑。以皇后父車騎將軍封千五百戶。二年反誅。平恩戴侯許廣漢。以皇太子外祖父昌成君侯。五千六百戶。地節三年四月戊申封。七年薨。亡後。初元元年。共侯嘉以廣漢弟子中常待紹侯。二十二年薨。河平二年嚴侯況嗣。鴻嘉二年質侯旦嗣。二十九年薨。建國四年侯敬嗣。王莽敗絕。平昌節侯王無故。以帝舅關內侯侯。六百戶。四年二月甲寅封。九年薨。五鳳元年。考侯接嗣十六年薨。永光三年。釐侯臨嗣二十一年薨。鴻嘉元年。侯獲嗣三十八年。

建武五年。詔書復獲樂昌共侯王武。以帝舅關內侯侯。六千戶。二月甲寅封。十四年薨。甘露二年。戾侯商嗣。二十七年薨。河平四年。侯安嗣。二十七年。元始三年。爲王莽所殺。樂陵安侯史高。以悼皇考舅子侍中關內侯。與發霍氏姦侯。二千三百戶。八月乙丑封。二十四年薨。永光二年。嚴侯術嗣。十一年薨。建始二年。康侯崇嗣。四年薨。亡後。元延二年六月癸巳。侯淑以崇弟紹封。亡後。元始四年侯岑以高曾孫紹封。王莽敗絕。邛成共侯王奉先。以皇后父關內侯侯。二千七百五十戶。元康二年三月癸未封。十八年薨。初元二年。侯敞嗣。二十八年薨。鴻嘉二年。侯勳嗣。十四年。建平二年。坐選舉不以實。罵廷史。大不敬。免。元始元年。侯堅固以奉先曾孫紹封。王莽敗絕。將陵哀侯史魯。以悼皇考舅子侍中中郎將關內侯有舊恩侯。二千二百戶。三月乙未封。五年神爵四年薨。亡後。平臺康侯史玄。以悼皇考舅子侍中中郎將關內侯有舊恩侯。千九百戶。三月乙未封。二十五年薨。建昭元年。戴侯恁嗣。十九年薨。鴻嘉二年。侯習嗣。博望頃侯許舜。以皇太子外祖父同產弟長樂。

衛尉有舊恩侯千五百戶。三月乙未封。四年薨。神爵三年。康侯敞嗣。八年薨。甘露三年。戾侯黨嗣。二十六年薨。河平四年。釐侯并嗣。薨。亡後。樂成敬侯許延壽。以皇太子外祖父同產弟侍中關內侯。有舊恩侯千五百戶。三月乙未封。十年薨。甘露元年。思侯湯嗣。六年薨。初元二年。哀侯常嗣。九年薨。元延二年。節侯恭以常弟紹封千戶。建昭元年。康侯去疾嗣。二十一年。鴻嘉三年薨。亡後。陽平頃侯王禁。以皇后父侯二千六百戶。子鳳以大將軍益封五千四百戶。凡八千戶。初元元年三月癸卯封。六年薨。永光二年。敬成侯鳳嗣。二十四年薨。陽朔三年。釐侯襄嗣。十九年薨。建平四年。康侯岑嗣。十三年薨。建國三年。侯莫嗣。十二年。更始元年爲兵所殺。安成共侯崇。建始元年二月壬午。以皇太后母弟散騎光祿大夫關內侯侯萬戶。二年薨。建始三年。靖侯奉世嗣。三十九年薨。建國二年。侯持弓嗣。王莽敗絕。平阿安侯譚。河平二年六月乙亥。以皇太后弟關內侯侯二千一百戶。十一年薨。永始元年。刺侯仁嗣。十九年。爲王莽所殺。元始二年。侯述嗣。建武二年薨。絕。成都景

侯商。六月乙亥。以皇太后弟關內侯侯。二千戶。以大司馬益封二千戶。十六年薨。
元延二年。侯況嗣。四年。綏和二年。坐山陵未成。置酒歌舞。免。建平元年。侯邑以況
弟紹封。王莽篡位。爲隆新公。與莽俱死。紅陽荒侯立。六月乙亥封。以皇太后弟關
內侯侯。二千一百戶。三十年薨。元始四年。侯柱嗣。王莽敗絕。曾孫武桓侯弘。建武
元年。以父丹爲將軍。戰死。往與上有舊。侯。曲陽煬侯根。六月乙亥。以皇太后弟關
內侯侯。三千七百戶。再以大司馬益封七千七百戶。哀帝又益二千戶。凡萬二千
四百戶。廿一年薨。建平元年。侯涉嗣。爲莽所殺。高平戴侯逢時。以皇太后弟關內
侯侯。三千戶。十八年薨。元延四年。侯置嗣。王莽敗絕。新都侯莽。建始元年。以帝舅
子侯。後篡位誅。安陽敬侯王音。以皇太后從弟。大司馬車騎將軍侯。千六百戶。子
舜益封。六月己巳封。五年薨。永始二年。侯舜嗣。王莽篡位。爲安新公。建國三年。公
攝嗣。更號和新公。與莽俱死。成陽節趙臨。以皇后父侯。二千戶。永始元年。四月乙
亥封。五年薨。元延二年。侯訴嗣。建平元年。坐弟昭儀絕繼嗣。免。徙遼西。新成侯欽。

綏和二年五月。以皇太后弟封一年。建平元年。坐弟昭儀絕繼嗣。免徙遼西。宜鄉侯馮彥。以中山王舅侯。千戶。綏和元年二月甲子封。建平元年。坐姊中山太后祝詛。自殺。陽安侯丁明。以帝舅侯五千戶。綏和二年四月壬寅封。七年。元始元年。爲王莽殺。孔鄉侯傅晏。以皇后父侯三千戶。又益二千戶。四月壬寅封。六年。元壽二年。坐亂妻妾位。免徙合浦。平周侯丁滿。以帝舅子侯。千七百三十九戶。五月己丑封。元始三年。坐非正免。高武貞侯傅喜。以帝祖母皇太后從父弟。大司馬侯。二千三十戶。建平元年正月丁酉封。十五年薨。建國二年。侯勁嗣。王莽敗絕。汝昌侯傅商。以皇太后從父弟。封千戶。後以奉先侯祀。益封。凡五千戶。四年二月癸卯封。一年。元壽元年。坐外附諸侯。免。元壽二年五月。侯昌。以商兄子紹奉祀。封。八月。坐非正免。按平帝舅衛寶等。爵止關內侯。故表不列。又外戚傳。長平侯衛伉。坐詛咒誅。表亦不見。孝武陳后母家。本堂邑侯陳午。其子堂邑侯須。隆慮侯融。皆以元鼎元年。坐母公主卒未除服姦。兄弟爭財。自殺。已在陳后廢後。此可謂未蒙外戚

之福而受外戚之禍者。王莽易漢爲新。且弑平帝。可謂篡弑大逆。兼而有之。視韓彭之反形未具者何如。視呂霍又何如。而建武之初。王氏重侯。仍盛于世。豈史公所云竊鉤者誅。竊國者侯。有驗于茲歟。自定陶共皇議起。後漢元魏。由旁支入立者。多自皇或自帝其親。甚且稱祖稱宗。金元亦如之。而宋濮王明興獻二議。爭持尤激烈。清乾隆中。特著濮議辨。以正之。師丹諸人之議。申而冷褒段猶之說廢。光緒尊崇本生典禮。純本濮議辨。是矣。是篇師丹謂成帝之政。當三年無改。此太拘。漢之高文光明。唐之太宗。宋之太祖。後人不改其政可也。否則通變因時。豈宜拘囿。宋章惇蔡京諸人。以紹述劫制哲宗徽宗者。即持此說。其亦師丹所不及料也。爰附誌于此。

董賢嬖倖按語

按漢書佞倖傳。自鄧通以次。至董賢。共八人。以無宦者傳。故石顯亦附。特董賢竟拜三公。策文遂有允執其中之語。哀帝並曰。欲法堯禪舜。則更爲千古佞倖未有之奇。漢代以少年而爲公者。前則衛青。後則鄧禹。禹中興元功。固非所論。而衛青則實與董賢相仿。如無北征之功。史家未必不入之佞倖傳。宋佞倖有弭德超。曾覲等。明有紀綱。門達等。皆未可望董賢項背。惟江彬。錢寧。勢頗熏灼。然皆摠軍旅。豫征伐。本末又與董賢不同。似明武宗之於于永。或得董賢之彷彿。而永位止都督。去三公尙遠。孔光以名儒爲相。竟衣冠出門。待董賢車。蓋鑒傳后之忤。懲王嘉之禍。然直可謂儒道掃地。大節傾頽。固不待附和。王莽也。宋人有詩。謂之曰。試問諱言溫室樹。何如休望董賢車。誠無以爲光解。漢賦入名目。已于成帝荒淫按語內附誌。是篇毋將隆奏。武庫兵器。天下公用。國家武備。繕治造作。皆度大司農錢。大司農錢。自乘輿不以給共養。共養勞賜。一出少府。蓋不以本臧給末用。不以

民力共浮費。別公私。示正路也。云云。是漢代國用。均有定制。大司農掌諸錢穀金帛。郡國四時上月旦見錢穀簿。邊郡諸官請調度者。皆爲報給。損多益寡。取相給足。（見續漢書百官志）少府掌山海池澤之稅。以給共養。合毋將隆所言考之。是郡國金穀收之田租算賦者。皆給國家公用。收之山林池澤者。乃給天子私用。孝武時。孔僅咸陽言。山海天地之臧。宜屬少府。陛下弗私。以屬大農佐賦。是也。就漢代國家公用言之。實以軍費吏祿爲大端。軍費以衛兵戍兵爲主。數目不可詳究。約在二十萬。孝文紀二年十一月詔曰。因各敕以職任。務省繇（徭）費。以便民。朕旣不能遠德。故惻然念外人之有非。是以設備未息。今縱不能罷邊屯戍。又飭兵厚衛。其罷衛將軍軍。太僕現馬遺財足。餘皆以給傳置。十四年。匈奴寇邊。中尉周舍爲衛將軍。郎中令張武爲車騎將軍。軍渭北。騎卒十萬人。孝武紀。建元元年。七月詔曰。衛士轉置。送迎二萬人。其省萬人。是漢之衛兵。以萬人爲常額。高帝紀。十一年七月。發中尉卒三萬人。爲皇太子衛。是中尉（即執金吾）以三萬兵爲額。

孝宣紀。地節三年十月。罷車騎將軍。右將軍屯兵。甘露三年二月。單于罷歸。遣長樂衛尉高昌侯忠。車騎都尉昌。騎都尉虎將萬六千騎。送單于。此皆在衛兵數內。孝元紀。初元三年六月。詔罷甘泉建章宮衛。令就農。而武帝置司隸城門中壘屯騎步兵越騎長水胡騎射聲虎賁諸校尉。皆領兵。以續漢志注校尉八百人考之。則當爲六千四百人。是漢京兵常在五萬以上。若戍卒之數。食貨志言六十萬者。乃武帝臨時之制。又以王莽邊兵二十萬人。仰縣官衣食爲多。似平時在十萬以下。孝武孝宣本紀。每言減戍卒。孝平紀。元始二年九月。使謁者大司馬掾四十四人持節行邊兵。又孝昭紀。遼東烏桓反。范明友爲度遼將軍。將北邊七郡。郡二千人。騎擊之。趙充國傳。武威張掖酒泉萬騎。合漢緣邊。敦煌酒泉張掖武威金城北地安定上郡朔方西河九原雲中定襄雁門代郡上谷燕國右北平漁陽遼西遼東。凡二十餘郡。每郡以二三千人計之。諸郡計之。邊兵至少亦在五萬以上。而武都南至益州牂牁交趾。東至會稽豫章。臨邊臨海者。必仍有屯兵。約略計衛兵。

邊兵總合在十五萬以上。以趙充國傳萬二百八十一人。用穀二萬七千三百六十三斛計之。是一人月用穀當廿六斛。又以本傳一人三十日食米二斛四斗。麥八斛計之。則爲一人月十斛有贏。蓋一言穀一言米。以二穀一米計之。數亦差相等。是十五萬兵歲當需米一千八百萬斛有贏。而鹽尙在外。食貨志又曰漢興民失作業而大飢饉。天下既定民亡蓋藏。上于是約法省禁。輕田租什五而稅一。量吏祿度官用以賦于民。百官公卿表佐史至丞相十二萬二百八十五人。按自三公以下月支錢米數目皆見續漢百官志。劉注百石月米四斛八斗。是一歲當五十七斛六斗。月錢八百。是一歲當九千六百。以十萬人計之。當米五百七十六萬斛。錢九萬六千。加三公至二百石計之。米當在一千萬斛以上。錢則僅當米十分之一。爲一百萬千。貢禹傳諫大夫秩八百石。奉錢月九千二百。光祿大夫秩二千石。奉錢月萬二千。續漢志劉注引荀綽晉百官表注。漢延平中眞二千石月錢六千五百。則止及貢禹傳二千石月奉錢之半。似前漢官俸優于後漢。即以此項

奉錢計之。亦當在二百萬千以上。其他用度之可考者。貢禹傳。奏言。方今齊三服官。作工各數千人。一歲費數鉅萬。蜀廣漢主金銀器。歲各用五百萬。三工官。官費五千萬。又諸官奴婢十萬餘人。戲游無事。歲費五六鉅萬。（宜免）爲庶人。令代關東戍卒。乘北邊亭塞候望。以此考之。則北邊戍卒。當在十萬人以內。又武帝置初郡十七。（南海。蒼梧。鬱林。合浦。交趾。九真。日南。珠崖。儋耳。武都。牂柯。越雋。沈黎。汶山。犍爲。零陵。益州。）以其故俗治。無賦稅。南陽漢中以往。各以地比給初郡。吏卒奉食幣物。傳衣馬被具。此亦經用之一略。如清甘肅新疆雲貴之有協餉。漕運亦漢後經用一大端。食貨志。漢初轉漕關東粟。以給中都官。歲不過數十萬石。武帝作柏梁臺。宮室之修。由此日麗。徒奴婢衆。而下河漕。度四百萬石。元封元年。桑弘羊又令民入粟補吏贖罪。他郡各輸急處。而諸農各致粟。山東漕益歲六百萬石。一歲之中。太倉甘泉倉滿。邊餘穀。宣帝即位。歲數豐穰。耿壽昌言。故事歲漕關東穀四百萬斛。以給京師。用卒六萬人。宜糴三輔弘農河東上黨太原穀。足供京

師可省關東漕卒過半。漕事果便。東都賦曰。東郊則有通溝大漕。潰渭洞河。泛舟山東。控引河湖。與海通波。是也。唐亦賴東南之漕。以給京師。武帝用費最多。以今預算例之。皆可曰臨時。而軍需爲大。食貨志。衛青比歲十餘萬衆。擊胡。斬捕首虜之士。受賜黃金二十萬斤。而兵甲轉漕之費不與。票騎（霍去病）仍再出擊胡。大克。獲渾邪王數萬衆來降。漢發車三萬輛迎之。既至。受賞賜及有功之士。是歲費凡百餘鉅萬。明年大將軍票騎。大出擊胡。賞賜五十萬金。（轉漕車甲之費。不與。）甘延壽陳湯傳。劉向疏曰。貳師將軍。捐五萬之師。糜億萬之費。又志言南粵反。西羌侵邊。天子爲山東不澹。（瞻）赦天下囚。因南方樓船士二十餘萬人。擊粵。發三河以西騎擊羌。又數萬人。渡河築令居。初置掖酒泉郡。而上郡朔方西河河西。開官田。斥塞卒六十萬人戍田之。（戍而田。）中國繕道餽糧。遠者三千。近者千餘里。皆仰給大農。桑弘羊爲治粟都尉。領大農。請置大農部丞數十人。分部主郡國。各往往置均輸鹽鐵官。令遠方各以其物。如異時商賈所轉販者。而置平準。

于京師。大農諸官盡籠天下之貨物。貴則賣之。賤則買之。於是天子北至朔方。東封泰山。巡海上。旁北邊以歸。所過賞賜用帛百餘萬匹。錢金以鉅萬計。皆取足大農。諸均輸帛五百萬匹。民不益賦。而天下用饒。按此言民不益賦者。專就是年封泰山巡北邊而言。實則算舟車。算繒。告繒。民賦至數百。及養馬等一切苛暴之政。皆由用兵而起。其後用兵之費鉅者。神爵中征羌。費四十餘萬萬。大司農錢盡。乃以少府禁錢續之。初元中。珠厓之反。興兵擊之。連年費用三萬萬餘。皆見賈捐之傳。至武帝通道置郡。費亦重。司馬相如傳。唐蒙已略通夜郎。因通西南夷道。發巴蜀廣漢卒。作者數萬。治道二歲。費以億萬計。史記平準書。嚴助朱買臣等招來東甌。事兩粵。江淮之間。蕭然煩費。彭吳賈置滄海之郡。則燕齊之間。靡然發動。人徒之費。擬于南夷。(漢通西南夷道。千里負擔饋糧。率十餘鍾致一石。散弊于功燹。悉巴蜀租賦。不足以更之。)以此推之。則漢自朔方起。亭障至鹽澤。亦一大費。而朔方武威諸郡初置。無賦稅。亦必仰給于關中諸郡。又孝武時營繕宮室。糜費亦

鉅。郊祀志。令長安作飛廉桂館。甘泉作延壽益壽館。廣諸宮室。作建章宮。度千門萬戶。其北治大池。漸臺高二十餘丈。名曰泰液。池中有蓬萊方丈瀛州壺梁象海中神山象魚之屬。其南有玉堂璧門。立神明臺。并幹樓。高五十丈。輦道相屬。三輔黃圖。集靈宮。望仙觀。明光宮等。皆武帝宮觀名。此外尙多。是皆耗竭民財而成。國力虛耗。固不專由征伐也。若賑災。移民。塞河。亦爲漢經用大端。孝武紀。元鼎二年夏。大水。關東餓死者以千數。秋九月。詔曰。今水潦移于江南。迫隆冬至。朕懼其饑寒不活。江南之地。火耕水耨。方下巴蜀之粟。致之江陵。遣博士等分循行諭告所抵。毋令重困。吏民有振救饑民。免其阨者。具舉以聞。孝昭紀。元鳳三年。詔曰。迺者民被水災。朕虛倉廩。使使者以振困乏。孝元紀。初元元年九月。關東郡國十一大水。飢人或相食。轉旁郡錢穀以相救。孝成紀。永始二年。詔曰。關東歲比不登。吏民以義收食貧民。入穀物。助縣官振贍者。已賜食。其百萬以上。加賜爵右更。欲爲吏補三百石。其吏也。遷二等。（已爲吏者。自原秩遷二等。）三十萬以上。賜爵五大